

Kalaallit Nunaanni masarsoqarfiit nunanit tamalaanit toqqarneqartut illersorneqarnissaat aamma timmissat imarmiut ilaasa illersorneqarnissaat pillugu Namminersorlutik Oqartussat nalunaarutaat

Pinngortitamik illersuineq pillugu Inatsisartut inatsisaanni nr. 29-mi, 18. december 2003-meersumi § 5, imm. 1, nr. 4 aamma 6-imiit 9-mut, § 11, § 16, § 39, imm. 5, § 49 aamma § 63, piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi § 15, imm. 4 aamma Kalaallit Nunaannut pinerluttulerinermut inatsimmi §§ 17-imiit 19-imut, §§ 127-imiit 128-imut aamma §§ 166-imiit 170-imut naapertorlugit aalajangersarneqarput:

Kapitali 1

Siunertaq

§ 1. Nalunaarummi siunertaavog Kalaallit Nunaanni sumiiffiit Ramsar-eqarfusut illersorneqarnissaat, aammalu sunik sumiiffimmi ingerlataqartoqaqqusaanersoq maleruagassiinissaq. Sumiiffinni pinngortitap uumasullu piujuartinneqartussatut inissisimanerisa imaluunniit sumiiffinni pinngortitap ataqatigiittut isikkoqarnerata ajornerulersinneqannginnissaata qulakkerneqarnissaa siunertaralugu tamanna pivoq. Nalunaarut masarsoqarfiit nunanut tamalaanut pingaaruteqartut pillugit sumiiffinnut Ramsar-eqarfusunut nunani tamalaani isumaqatigiisummi, 2. februar 1971-imeersumi Kalaallit Nunaata nunanut tamalaanut pisussaaffinik atuutsitsilernissamut tapertaassaaq.

Killiliussat nassuiaatillu

§ 2. Nalunaarut sumiiffinni Ramsar-eqarfusuni ingerlatsinermut sinaakkusiivoq aammalu sumiiffinni pinngortitamik uumasunillu illersuinissamut maleruagassat minnerpaaffissaat ilaatinneqarlutik. Inatsisit allat naapertorlugit pinngortitamik uumasunillu illersuinissamut piumasaqaatinik sakkortunerusunik aalajangersaasoqarsimappat, taakku nalunaarummit matumangga salliutinneqassapput.

Imm. 2. Nalunaarut pinngortitamik illersuinerlut inatsimmi § 4 naapertorlugu pisuussutsinik uumaatsunik, ilanngullugit aatsitassat, misissueqqaarnermut, aatsitassarsiorluni misissuinerlut pianaanermullu atorineqassanngilaq.

§ 3. Nassuiaatit:

1) Angallatit motoorillit tassaapput qamutit larvefodinik assakaasunilluunniit ingerlatillit, sikukkut,

aputikkut, qaqqatigut pinngortitamilu nunami allatut ilusilimmi angallatitut ilusiligaasut atorineqartulluunniit.

2) Kommunalbestyrelsi tassaavoq kommunimi Ramsar-eqarfiup inissisimaffigisaani aalajangersimasumi kommunalbestyrelsi.

Sumiiffiit Ramsar-eqarfiit nalunaarsorsimaffii

§ 4. Sumiiffiit Ramsar-eqarfusut ilanngussaq 1-imi aamma 2-mi allassimapput.

Kapitali 2

Tamanit tikinneqarsinnaanera atorineqarsinnaaneralu

§ 5. Kapitali 2-mi killilersuinerit aalajangersagaasut malinneqartillugit kikkulluunniit Ramsar-eqarfinnukarsinnaatitaapput.

Qamutininik motoorilinnik nunakkut angalaneq

§ 6. Aprilip ulluisa 15-anniit septembarip ulluisa 30-annut sumiiffinni Ramsar-eqarfusuni angallatit motoorillit atorlugit nunakkut angalanissaq inerteqqutaavoq, taamaattorli imm. 2-miit 4-mut takukkit.

Imm. 2. Pinngortitamut, Avatangiisinut Nukissiuuteqarnermullu Naalakkersuisoqarfik sumiiffinni Ramsar-eqarfusuni nunakkut angallatit motoorillit atorlugit angalanissamut akuersissuteqarsinnaavoq:

- 1) Angalaneq pinngortitamut uumasunullu annertuumik sunniuteqassangatinneqanngippat.
- 2) Ilisimatusarneq misissuinissarlunniit, tassungalu ilanngullugu erngup nukinganik isumalluutininik misissueqqaarnissaq siunnerfigalugit angalanissaq pisariaqarpat.

Imm. 3. Pinngortitamut, Avatangiisinut Nukissiuuteqarnermullu Naalakkersuisoqarfik akuersissuteqarnermut atatillugu piumasaqaatinik, pinngortitamut uumasunullu sunniutininik annikillititsissusanik aalajangersaasinnaavoq.

Imm. 4. Pisuni matuma kinguliani taaneqartuni imm. 1-imi allassimasut apeqqutaatinnagit qamutininik angallatinik atuisoqarsinnaavoq:

- 1) Ujarlernerit, annaassiniarnerit imaluunniit ajornartoornerit assingusut.
- 2) Politiit, aallaaniarnermut aalisarnermullu nakkutilliisut imaluunniit nakkutilliineri oqartussaasut sulinerannut atatillugu.
- 3) §§ 9-imiit 12-imut naapertorlugit akuersissummi imaluunniit akuersissuteqarnermi ingerlatassatut akuerineqarsimasunut atatillugu.

Immakkut angalaneq

§ 7. Sumiiffinni Ramsar-eqarfusuni juulip ulluisa aallaqqaataanniit septembarip ulluisa 30-iannut 10 knob sinnerlugu sukkassusilimmik immakkut angalasoqaqqusaanngilaq, taamaattorli imm. 2 takuuk.

Imm. 2. Pisuni matuma kinguliani taaneqartuni imm. 1 atuutissanngilaq:

- 1) Angallavinni nalunaarsorneqarsimasuni imaatigut angalanerit.
- 2) Ujarlernerit, annaassiniarnerit imaluunniit ajornartoornerit assingusut.

- 3) Politiit, aallaaniarnermut aalisarnermullu nakkutilliisut imaluunniit nakkutilliinermi oqartussaasut sulinerannut atatillugu.
- 4) Issittumi Sakkutooqarfiup annaassiniarnernik suliaqarluni angalanerinut atatillugu.
- 5) §§ 9-imiit 12-imut naapertorlugit akuersissummi imaluunniit akuersissuteqarnermi ingerlatassatut akuerineqarsimasunut atatillugu.

Timmisartumik qulaassisarnerit timmisartornerillu

§ 8. Sumiiffiit Ramsar-eqarfusut silaannartaanni apriliip ulluisa 15-anniit septembarip ulluisa 30-annut immap qaaniit imaluunniit nunamiit 500 meterinit appasinnerusumi timmisartornissaq inerteqqutaavoq, taamaattorli imm. 2-miit 4-mut takukkit.

Imm. 2. Pinngortitamut, Avatangiisinut Nukissiuuteqarnermullu Naalakkersuisoqarfik sumiiffinni Ramsar-eqarfusuni timmisartornissamut akuersissuteqarsinnaapput:

- 1) Timmisartumik qulaassineq pinngortitamut uumasunullu annertuumik sunniuteqartussatut naliliiffigineqanngippat.
- 2) Ilisimatusarneq misissuinerlu eqqarsaatigalugit timmisartumik qulaassinissaq pisariaqarpat.

Imm. 3. Pinngortitamut, Avatangiisinut Nukissiuuteqarnermullu Naalakkersuisoqarfik akuersissuteqarnermut atatillugu piumasaqaatinik, pinngortitamut uumasunullu sunniutinik annikillititsisussanik aalajangersaasinnaavoq.

Imm. 4. Pisuni matuma kinguliani taaneqartuni imm. 1-imi allassimasut apeqqutaatinngit timmisartortoqarsinnaavoq:

- 1) Ujarlernerit, annaassiniarnerit imaluunniit ajornartoornerit assingusut.
- 2) Nakkutilliinermi oqartussaasut sulinerannut atatillugu.
- 3) Miffusinnaasut imaluunniit silaannakkut angallannermut maleruagassat pissutaallutik allatut iliuuseqarnissaq pisariaqartinneqarpat.
- 4) §§ 9-imiit 12-imut naapertorlugit akuersissummi imaluunniit akuersissuteqarnermi ingerlatassatut akuerineqarsimasunut atatillugu.

Illuaqqanut sanaartukkanullu nunaminertanut pilersaarutit akuersissutillu

§ 9. Pinngortitamut, Avatangiisinut Nukissiuuteqarnermullu akuersissummik piniaqqaarani, sumiiffinni Ramsar-eqarfusuni illunik sanaartukkanillu aalaakkaasunik allanik sananissaq, illunik pioreersunik alliliinissaq allanngortiterinissarluniit, kiisalu aqqusinernik pisinnaallu aqquserninik sananissaq inerteqqutaavoq, taamaattorli § 10, imm. 2 takuuk.

§ 10. Kommunalbestyrelsi sumiiffinnut Ramsar-eqarfusut iluanni inissisimasunut kommunimut pilersaarusiorpat, kommunimut pilersaarutissatut siunnersuut atuutsinneqalinnginnerani Pinngortitamut, Avatangiisinut Nukissiuuteqarnermullu Naalakkersuisoqarfimmut akuerisassanngorlugu nassiunneqassaaq. Kommunalbestyrelsip kommunimut pilersaarummik nassiussinermi suliami sumiiffik Ramsar-eqarfusooq pineqartoq erseqqissaatigissavaa.

Imm. 2. Sumiiffimmut Ramsar-eqarfusumut atatillugu kommunimut pilersaarut akuerineqarpat, kommunalbestyrelsi kommunimut pilersaarut naapertorlugu nunaminertamik atuinissamut

akuersissummik nalunaaruteqarsinnaavoq. Taamatut pisoqartillugu nunaminertamik atuinnissamut akuersissuteqartoqassappat, § 9 naapertorlugu akuersissuteqarnissaq piumasarineqanngilaq.

§ 11. § 9 naapertorlugu qinnuteqaammut aamma § 10, imm. 1 naapertorlugu kommunimut pilersaarutissatut siunnersuummut, sumiiffimmi Ramsar-eqarfusumi pinngortitamut uumasunullu kingunerisassatut naatsorsuutigineqartut pillugit paasissutissat ilanngullugit nassiunneqassapput.

Imm. 2. Pinngortitamut, Avatangiisinut Nukissiuuteqarnermullu Naalakkersuisoqarfik § 9 naapertorlugu suliat imaluunniit § 10, imm. 1 naapertorlugu kommunimut pilersaarutissatut eqqarsaatigineqartut sumiiffimmi Ramsar-eqarfusumi pinngortitap uumasullu eriajisassatut inissisimanerannik ajornerulersitsissanersut naliliissaaq.

Imm. 3. Imm. 2 naapertorlugu naliliinermi suliasatut eqqarsaatigineqartut sumiiffimmi Ramsar-eqarfusumi pinngortitap uumasullu eriajisassatut inissisimanerannik ajornerulersitsissatut naliliisoqarpat, aatsaat suliasat inuiaqatigiinni soqutigisat annertuut eqqarsaatigalugit pisariaqartutut isumaqarfigineqarpata akuersissummik nalunaaruteqartoqarsinnaavoq imaluunniit kommunimut pilersaarut akuerineqarsinnaavoq.

§ 12. Akuersissut tunniunneqarpat, imaluunniit kommunimut pilersaarut akuerineqarpat, kommunimut pilersaarummi imaluunniit akuersissummi piumasaqaatinik, pinngortitamut uumasunullu sunniutininik annikillisisussanik aalajangersaasoqarsinnaavoq. Atugassarititaasut kommunalbestyrelsip attuumassuteqartup oqaaseqaataanik piniareernerup kingorna Pinngortitamut, Avatangiisinut Nukissiuuteqarnermullu Naalakkersuisoqarfiim aalajangersarneqassapput.

Imm. 2. Pinngortitamut, Avatangiisinut Nukissiuuteqarnermullu Naalakkersuisoqarfiup pisariaqartikkuniuk, akuersissutaasinnaasumik tunniussaqaannginnermini imaluunniit kommunimut pilersaarutip akuerineqarneranik nalunaaruteqartoqannginnerani kikkulluunniit oqaaseqarnissaannik periarfississinnaavai.

Imm. 3. Pinngortitamut, Avatangiisinut Nukissiuuteqarnermullu Naalakkersuisoqarfiup Pinngortitaleriffik § 11, imm. 2 naapertorlugu naliliinermut aamma imm. 1 naapertorlugu piumasaqaatinik aalajangersaanermut oqaaseqartissinnaavaa.

Suliat allat

§ 13. Sumiiffinni Ramsar-eqarfusuni timmissat imarmiut nerisatigut tunngavissaasa qularnaarneqarnissaat eqqarsaatigalugu qalut puttasut, qalut natersiutit kiliortuutillu uiluinniutit atorlugit aalisarneq inerteqqutaavoq.

Imm. 2. Sumiiffinni Ramsar-eqarfusuni juulip ulluisa aallaqqaataanniit septembarip ulluisa 30-annut qassutit atorlugit aalisarneq inerteqqutaavoq.

Imm. 3. Sumiiffinni Ramsar-eqarfusunik qeqqussanik killuinissaq inerteqqutaavoq.

§ 14. Sumiiffinni Ramsar-eqarfusuni nunalerineq, uumasuuteqarneq, naatitsineq imaluunniit naasortarneq inerteqqutaavoq.

Kapitali 3

Nakkutilliineq aqutsinerlu

§ 15. Kommunalbestyrelsip attuumassuteqartup nalunaarut manna malinneqarnersoq nakkutigissavaa.

Imm. 2. Pinngortitamut, Avatangiisinut Nukissiuuteqarnermullu Naalakkersuisoqarfiup sumiiffinni Ramsar-eqarfusuni, kommunit aggornerisa avataanniittuni nalunaarut manna malinneqarnersoq nakkutigissavaa.

§ 16. Pinngortitamut, Avatangiisinut Nukissiuuteqarnermullu Naalakkersuisoqarfik kommunalbestyrelsinut attuumassuteqartunut tusarniaaareernermini sumiiffinni Ramsar-eqarfusuni ingerlatsinissamut pilersaarusiorsinnaavoq.

Pineqaatissiissutit

§ 17. § 6, imm. 1-imik, § 7, imm. 1-imik, § 8, imm. 1-imik, § 9-mik, § 13-imik aamma § 14-imik unioqqutitsinerit akiliisitsinermik kinguneqarsinnaapput, takuuk pinerluttulerinermut inatsimmi kapitali 26 aamma 37.

Imm. 2. Piumasaqaatinik § 6, imm. 3, § 8, imm. 3 aamma § 12, imm. 1 naapertorlugit aalajangersarneqartunik unioqqutitsinerit akiliisitsinermik kinguneqarsinnaapput, takuuk pinerluttulerinermut inatsimmi kapitali 26 aamma 37.

Imm. 3. Pinerluttulerinermut inatsimmi kapitali 5-imi maleruagassat malillugit inuit pisinnaatitaasut pisussaataasullu akiliisussanngortinneqarsinnaapput.

Imm. 4. Nalunaarut manna naapertorlugu akiliisitsissutaasut Nunap Karsianut tutsinneqassapput.

§ 18. Pinngortitamut, Avatangiisinut Nukissiuuteqarnermullu Naalakkersuisoqarfiup nalunaarummik imaluunniit nalunaarut naapertorlugu maleruagassianik unioqqutitsisoqarneranut atatillugu akuersissutit, nalunaarut manna imaluunniit nalunaarut naapertorlugu maleruagassiat naapertorlugit tunniunneqartut, utertissinnaavai.

Atuutsitsilernerneq aalajangersakkat

§ 19. Nalunaarut manna 1. septembari 2016-mi atuutilerpoq.

Namminersorlutik Oqartussaq, 1. juni 2016.

Mala Høy Kúko

/

Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut